

Акафист святым преподобным Андронику и Савве

Кондак 1

Избранным от юности своея молитвенником усердным к Сладчайшему Господу Иисусу за землю Российскую благодарственное пение из глубины сердец наших приносим вам, преподобнии отцы. Вы же, яко имущии велие дерзновение к судии живых и мертвых, испросите у Христа Бога грехов наших прощение, да зовем вам тако: Радуйтесь, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Икос 1

Ангельское воистинну ликостояние восполняли есте богомудрии отцы наши Андрониче и Савво, воздевающе преподобнии свои руце Царю веков Сладчайшему Господу Иисусу Христу молящесе о низпослании обители вашей всесильныя благодати Божия. Мы же, стояще в храме вашем и поклоняющесе вси ныне раце мощей ваших во умилении глаголем:

Радуйтесь, преподобнии отцы наши Андрониче и Савво, со ангельскими лики молящиися за ны Живоначальной Троице.

Радуйтесь, покровители обители нашея.

Радуйтесь, ходатаи наши усерднии.

Радуйтесь, целители болезней наших телесных.

Радуйтесь, утешители наших печалей душевных.

Радуйтесь, яко всем посещающим обитель вашу испросите тихое упокоение душевное.

Радуйтесь, научающи нас радоватися о Господе.

Радуйтесь, скорби наша в радость прелагающи.

Радуйтесь, дарующии нам пресладкую благодать Христову.

Радуйтесь, веселие наше духовное.

Радуйтесь, радости наша, яко не забываете чад ваших духовных.

Радуйтесь, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 2

Видя душевныма своима очима скорое свое к Богу отшествие, преподобне отче Андрониче, призвал еси богомудраго Савву и благословив сего пасти братию обители твоея, преставился еси во обители горния, идеже веселяся поеши Богу: Аллилуиа.

Икос 2

Разум богопросвещенный от юности своея, преподобне отче наш Савво, стяжав, и всего себе покорив в послушание Христово, инок преизряднейший явился еси во обители наставника твоего святаго Андроника. Мы же, ублажающе всечестную память вашу, вопием тако:

Радуйтесь, преподобнии отцы наши, пастырие наши предобрии.

Радуйтесь, собеседницы ангелов.

Радуйтесь, кротцыи ученицы пречуднаго Сергия.

Радуйтесь, в юности своей послушание изрядное тому показавшии.

Радуйтесь, подражателие равноангельскаго жития своего учителя и наставника.

Радуйтесь, яко измлада смирение и терпение, аки плоды некия пречудныя возрастившии.

Радуйтесь, Живоначальныя Троицы песнословцы.

Радуйтесь, обители нашея изящное украшение.

Радуйтесь, любящих Господа пресладкое увеселение.

Радуйтесь, яко во обитель вашу сподобилися есте прияти святыи нерукотворенный Образ Господень на Убрусе.

Радуйтесь, яко еще на земли вам сущым, в сердца ваша вселися солнце правды Христос и Бог наш.

Радуйтесь, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 3

Сила благодати Божия преезобильно излияся на вас, всечестнии отцы наши, еуже просвещаеми явилися есте воистинну источницы чудес изобильнии, всем притекающим к вам подающе исцеления и просветление душевное. Мы же благодарнии, собравшесе в обители вашей, вопием Богу Спасителю нашему: Аллилуиа.

Икос 3

Имея желание пламенное поработати Господеви и воздвигнути обитель иноческую, идеже воспевати Троицу Божественную, преподобне отче Андрониче, поведал еси тайну сердца своего преподобному Сергию, иже и избра тя первоначальником и сторителем обители Сладчайшаго Господа Иисуса, создатися некогда имущия. Темже дивящесе огненной любви твоей ко Господу, со страхом и любовию зовем ти:

Радуйся, Андрониче пречудный, весь аки серафим огнем любве Божия горяй.

Радуйся, всю красоту мира сего ни во что же вменивый.

Радуйся, все свое помышление, весь ум к Богу всяческих вперивый.

Радуйся, молитвенниче за нас к Богу теплый.

Радуйся, яко скоро послушаеши нас призывающих тя.

Радуйся, крине райскаго насаждения.

Радуйся, цвете благоуханный, процветый во обители дивнаго Сергия.

Радуйся, источниче, напаяй ниву Христову.

Радуйся, наставниче премудрый святаго Саввы, сподвижника твоего.

Радуйся, яко тому вся своя помышления всегда открывавый.

Радуйся, яко с Саввою блаженным велие тщание при строении обители сея явивый.

Радуйтесе, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 4

Бурею душевных волнений и плотских страстей одержимый притекл еси ко гробу твоему, Савво богومудре, священноинок и чадо твое духовное Ефрем с рыданием, прося у тебе, отче честный, заступления и помощи. И се услышал еси скоро моление его и даровал еси исцеление от недуга и мятущейся души тихое упокоение. Мы же памятующе велие сие чудо твое, из глубины сердец наших вопием Богу, дивному во святых Своих: Аллилуиа.

Икос 4

Слышаще людие житие ваше преподобнии, стекахуся в тихую обитель вашу и поведаху вам скорби своя и недуги. Любовию же вашею обласкаеми с миром идяху в дома своя обновленнии душею и телом. Мы же взирающе с любовию на всечестную раку святых мощей ваших, воспеваем тако:

Радуйтесе, преподобнии, укрощающии страсти наша телесныя вкупе и душевныя.

Радуйтесе, светильницы лучезарнии, просвещающии души наша.

Радуйтесе, наставницы заблудших от пути праваго.

Радуйтесе, града нашего щит и ограждение.

Радуйтесе, воины Христови, прогоняющии враги наша.

Радуйтесе, орли, восперяющии ум наш к небесным.

Радуйтесе, яко бесовския полки далече от нас прогоняющии.

Радуйтесе, братии о Христе обители наша несумненная надеждо.

Радуйтесе, безмолвия изящнии учителяе.

Радуйтесе, постом и бдением страсти своя укротившии.

Радуйтесе, сокровище неизживаемое на небеси обретшии.

Радуйтесе, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 5

Боготечную пречудную звезду, возсиявшую на востоце, честный нерукотворенный убрус Сладчайшаго Господа и Бога нашего Иисуса Христа из Царьграда пренесенный святителем Алексием, иже и постави его с честью во обители вашей преподобнии отцы наши, Андрониче и

Савво, всегда видяще пред очима нашими, устранимся дольних попечений, с трепетом взывающе Сладчайшему Иисусу Богу нашему: Аллилуиа.

Икос 5

Видев богомудрый Савва жития нашего многоболезненного суету и тление, еще же и иноплеменных яростная нашествия, иже разоряху обитель нову Спасову, всего себе предаде в руке Божии, велие показа тщание, устроая обитель и утешая страждущих, темже почитающе благочестное житие его, вопием верно:

Радуйся, пастырю кроткий незлобивый, не забываяй стадо твое духовное.

Радуйся, тщательный делателю нивы Христовы, страх Божий в сердцах наших насаждаяй.

Радуйся, благочестным житием своим вся окрестныя страны удививый.

Радуйся, врачу безмездный, исцеляяй раны душ и телес наших.

Радуйся, неоскудеваемый источниче благодати Христовы, еюже напаяеши верных сердца.

Радуйся, светилниче пресветлый, егоже свет светит пред человеки.

Радуйся, яко по глаголу Божию вси, видящии добрая дела твоя, прославляют Бога Отца твоего небеснаго.

Радуйся, молитвенниче за нас усердный, молитвами бо твоими прогониши от нас духи лукавья.

Радуйся, целомудрия и чистоты сердечныя неусыпный охранителю.

Радуйся, учениче кроткий Андроника святого, наставника своего.

Радуйся, яко зриши в небесных обителях святого своего наставника и с ним призираеши на обитель чад твоих.

Радуйтесь, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 6

Проповедует миру житие ваше равноангельское великий град Москва, идеже при реце Яузе, на горе, зрится храм Нерукотвореннаго Убруса Господня, в немже почивают мощи ваша честныя, преподобнии. Телом убо почиваете, на земли, духом же на небеси, идеже радующеся поете Богу Крепкому, Живому: Аллилуиа.

Икос 6

Возсия нам яко солнце лучезарное обитель ваша, преподобнии отцы наши, Андрониче и Савво, в нейже с верою молящимся даруете исцеления и просвещение душевное. Мы же чистым сердцем дерзаем воспевати вам тако:

Радуйтесь, сокровищницы многоценныя богатство неизживаемое.

Радуйтесь, сосуди избраннии Святаго Духа Утешителя.

Радуйтесь, бдением и сухоядением плоть свою умертвившии, да духом живете Господу своему.

Радуйтесь, радости духовныя нас исполняющи.

Радуйтесь, молитвенницы за нас усерднии.

Радуйтесь, яко вашими молитвами спасаеми побеждаем козни диавольския.

Радуйтесь, токи слез ваших бесовския полки потопившии.

Радуйтесь, научающи нас сокрушенным сердцем к Богу вопияти.

Радуйтесь, Православия столпи непоколебимии.

Радуйтесь, обитель свою от ереси и раскола неврежденну сохранившии.

Радуйтесь, спасающи нас от душевредных учений, ихже яко плевелы посевае лукавый.

Радуйтесь, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 7

Хотяще пламенно поработати пресладкому и всецедрому Иисусу Богу нашему, потщалися есте скорбным и тесным путем в небесное отечество внити. Сего ради многия труды и болезни подъяли есте, утончающе плоть свою, влекущую долу и усыряюще дух свой потоками слез. Темже и победными увязавшеся венцы, с лики преподобных прославляете прославльшаго вас Господа, радостно поюще песнь ангельскую: Аллилуиа.

Икос 7

Новое и славное чудо в Черном море бысть: кораблю бо потопляему от волнения бурного и страшного, святитель Алексей вопиет немолчно щедрому Иисусу, Егоже море и ветры послушают: и се внезапно тишина велия наста, еще же и брег недалече обретется, мы же стояще во обители сей, принесенней святителем, яко некий дар обетный щедрому Богу, всем сердцем воспоим преславных Андроника и Савву, игуменов и строителей ея, глаголюще:

Радуйтесь, яко в храме вашем, аки в корабли некоем спасаемся от бури житейских попечений.

Радуйтесь, яко молитвами вашими, аки ветром благовонным течем к пристанищу тихому и немятежному.

Радуйтесь, бури страстей наших утишающи.

Радуйтесь, путеводители наши во Отечество наше Небесное.

Радуйтесь, звезды светлыя, увеселяющыя нас в нощи греховней.

Радуйтесь, надеждо наша несумненная.

Радуйтесь, твердии веры адаманты.

Радуйтесь, яко во обитель вашу стекаются людие мнози на покаяние.

Радуйтесь, с лики ангельскими радуется и о едином грешнице кающемся.

Радуйтесь, яко обитель ваша честная уготовляет обильную Трапезу Божественную.

Радуйтесь, яко вернии насладившися Тоя Трапезы веселятся о Господе дивном во святых Своих.

Радуйтесь, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 8

Странное и дивное видение бысть некогда преподобному Сергию в пустыни Радонежской. В темную бо тихую ночь, стоящу ему на молитве, услыша глас некий, зовый его. Открывшу же ему оконце, осия его внезапно тихий свет райский, и виде множество прекрасных птиц, пресладкое испускающих пение. Неведомый же глас рече преподобному, яко тако умножатся ученицы твоя. Сего ради ублажим мысленныя тоя птицы: тихаго Андроника и богомудраго Савву, воспевающе Господеви немолчными усты: Аллилуиа.

Икос 8

Все в вышних обитаете, преподобнии, и нижних никакоже отступили есте: всегда бо духом посещаете нас любовию вас почитающих и поющих:

Радуйтесь, защито наша и прибежище.

Радуйтесь, печаль и уныние от нас отгоняющи.

Радуйтесь, выспрь дух наш всегда влекущи.

Радуйтесь, усопших братьий наших теплии молитвенницы.

Радуйтесь, яко вся упокоевающыяся под сению обители вашей, под кров свой приемлющи и за них Троице молящиися.

Радуйтесь, яко молитвами вашими Владыку всех умилоствляете.

Радуйтесь, иноков богобоязненных крестото любезная.

Радуйтесь, юношей и дев боголюбивых неусыпнии охранители.

Радуйтесь, старости надеждо нерушимая.

Радуйтесь, всем нам отцы духовнии и наставницы благочестия.

Радуйтесь, преподобнии и веселитесь, яко мзда ваша многа на небесех.

Радуйтесь, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 9

Всякое естество ангельское удивися, преподобнии, пречудному житию вашему на земли. Сего ради прослави вас Бог и Отец щедрот даром чудес и исцелений, яже точите неоскудно всем притекающим к вам и научаете пети Богу, промыслителю нашему: Аллилуиа.

Икос 9

Ветии многовещаннии недоумеют изрещи, преподобнии, силу любви вашей к человеку: никтоже бо тощ и неутешен исходил есть из обители вашей. Нам же яко некий дар любви вашей оставили есте святыи кладези цельбоносныя воды, егоже ископа Андроник пречудный. Темже любовию воздвигаеми воспеваем вам тако:

Радуйтесь, Сладчайшаго Господа Иисуса от юности возлюбившии.

Радуйтесь, яко и нас научаете ничтоже в мире сем преходящем любити и желати, токмо Единого Иисуса Пресладкаго.

Радуйтесь, яко к кладезю вашему ближнии и дальнии с верою притекают.

Радуйтесь, яко черплющим воду из кладезя вашего даруется исцеление.

Радуйтесь, сердца нашего райское увеселение.

Радуйтесь, ума нашего мысле крепкая.

Радуйтесь, чувств наших благодатное очищение.

Радуйтесь, радости наша, помяните нас в страшный день судный.

Радуйтесь, воины Христовы крепцыи, свободите ны от полков бесовских.

Радуйтесь, камение многоценное, имже украшается возлюбленная невеста Церковь Божия.

Радуйтесь, миро благовонное, егоже обоняют боголюбивых сердца.

Радуйтесь, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 10

Спасти хотяще души своя, преподобнии, оставили есте грешный мир, удалившеся в пустыню Сергиеву, в нейже ангельский образ прияли есте и со страхом и трепетом Господеви поработали есте. Темже и сподобилися есте быти строители и первоначальницы обетной обители святителя Алексия, с нимже ныне поете Богу, во святых почивающему: Аллилуиа.

Икос 10

Стена еси несокрушимая православному воинству российскому, двоице всехвальная и досточудная, преподобнии отцы наши Андрониче и Савво. Ибо надеющися на молитвы и заступление ваше, не погибнем от враг видимых и невидимых; темже радующися ублажаем вас тако:

Радуйтесь, воеводы непобедимии, ихже врази наши трепещут.

Радуйтесь, земли Российския надеждо крепкая и нерушимая.

Радуйтесь, православныя Российския земли преславнии чудотворцы.

Радуйтесь, воинов христоролюбивых победо несумненная.

Радуйтесь, молнии блистающая, еяже ужасаются вси христоненавистнии языцы.

Радуйтесь, яко молитвами вашими спасаемся от врагов наших.

Радуйтесь, яко убиенным на поли брани воином православным испросите у Царя царей и Господа господствующих венцы нетленные.

Радуйтесь, яко упокоющимся во обители вашей православным воином даруете тихое упокоение загробное.

Радуйтесь, яко обитель ваша воистинну место светлое, злачное и покойное упокоющимся в ней.

Радуйтесь, яко всегда за Отечество наше православное крепкаго во бранех Господа всегда умоляете.

Радуйтесь, в пленении сущим братьям нашим присное утешение.

Радуйтесь, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 11

Пение благодарения приносяще вам, преподобныи отцы, просим вас мы недостойнии, уязвите сердца наша к любви горней и пресладкой, да чистым сердцем и нескверными усты воспоем Богу нашему в Троице славимому: Аллилуиа.

Икос 11

Светозарнии светильницы явилися есте в нощи многомятежнаго и плачевнаго жития нашего, преподобнии отцы наши Андрониче и Савво, разгоняюще тьму неверия и озлобления и просвещающе землю Российскую светом веры Христовой, сего ради воспеваем вам тако:

Радуйтесь, светильницы пресветлии, огнем Божественным мир озаряющие.
Радуйтесь, яко и по отшествии вашем в небесныя обители непрестанное попечение о нас являющие.
Радуйтесь, в сонном видении многим являвшимся.
Радуйтесь, яко тем спящим представше, об обителях небесных Сладчайшаго Господа Иисуса поведаша.
Радуйтесь, яко точите православным людем российским неизсякающия источники чудес.
Радуйтесь, яко любовию почитающим вас во всех бедах и напастех скоро помогаете.
Радуйтесь, веры православныя утверждение.
Радуйтесь, горнему любомудрию нас научающие.
Радуйтесь, житием своим равноангельским путь в Царство Небесное нам указующии.
Радуйтесь, молитвенницы крепцыи за Русь православную.
Радуйтесь, яко честна пред Господем кончина ваша, преподобнии.
Радуйтесь, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 12

Благодать данную вам от Господа сил видяще, молим вас, пастырие наши и учителя, испросите у Христа Бога нашего мир и спасение граду нашему, обители нашей и живущим в ней, тишину и упокоение душевное и душам нашим велию милость, да воспоем Богу отцев наших песнь вечную: Аллилуиа.

Икос 12

Поюще и величающе дивнаго во святых своих Господа, ублажаем вас, преподобнии отцы наши Андрониче и Савво, и рцем тако:

Радуйтесь, наставницы монахов.

Радуйтесь, собеседницы ангелов.

Радуйтесь, яко молите о нас Христа Бога нашего.

Радуйтесь, скории помощницы в бедах наших.

Радуйтесь, преславнии чудотворцы земли Российския.

Радуйтесь, печали и уныния скории отгонители.

Радуйтесь, грешных к покаянию влекущи.

Радуйтесь, яко Россия почитает обитель, юже вы насадисте.

Радуйтесь, яко гнешнии и недостойнии прибегающие к вам велие утешение получают.

Радуйтесь, жизни нашея утешение.

Радуйтесь, молитв наших предивное укрепление.

Радуйтесь, преподобнии отцы наши Андрониче и Савво, обители Сладчайшаго Господа Иисуса Бога нашего первоначальницы и преславнии чудотворцы.

Кондак 13

О преславнии чудотворцы и угодницы Христови, преподобнии отцы наши Андрониче и Савво, примите малое сие моление наше от умиленнаго сердца вам приносимое, и испросите у Христа Бога нашего прощение согрешений наших, да всегда поем Тому Единому со Отцем и Святым Духом песнь хвалебную: Аллилуиа.

Кондак сей глаголи трижды, таже икос 1-й и кондак 1-й.

Молитва

О всехвальная и досточудная двоице, преподобнии отцы наши Андрониче и Савво! Услышите моление сие наше, утолите печали наша и болезни наша исцелите. Веруем бо и уповаем, яко вся потребная нам всегда даруете. Ведите убо преславнии, яко ладия души нашея мала есть, море же бурно и велико зело. Темже вопием вам: услышите нас преподобнии, и помозите нам многомятежное море жития сего прейти и брега пристанища тихаго достигнути, да сподобимся насладиться безсмертнаго жития и в радости и веселии со ангелы и всеми святыми воспевати и превозносить Отца и Сына и Святаго Духа во веки веков. Аминь.